

Regolament interni dal Centri interdipartimentâl pe ricercje su la culture e la lenghe dal Friûl "Josef Marchet" (CIRF)

Parê dal Consei di Aministrazion dal 17.06.1999

Fat bon dal Senât Academic dal 7.07.1999

Mandât fûr cun D.R. n. 633 dal 24.8.1999

Art. 1 Costituzion dal Centri

1. Li de Universitât dai Studis di Udin, di chi indenant clamade "Universitât", al è stât metût sù daûr dal art. 38 dal Statût il Centri Interdipartimentâl pe Ricercje su la culture e la lenghe dal Friûl (CIRF), di chi indenant clamât "Centri".

Art. 2 Finalitâts

1. Tignût cont des finalitâts assegnadis de Leç istitutive de Universitât dai Studis di Udin, che e je istituide cun chê di "... contribuî al progrès civîl, sociâl e ae rinassite economiche dal Friûl, e di divignî imprest organic pal svilup e pal rinovament dai riui origjnaris de culture, de lenghe, des tradizions e de storie dal Friûl" e di chês definidis dal art.1 dal Statût di Autonomie de Universitât di Udin che par chel e "promôf il svilup e il progrès de culture e des siencis midiant de ricercje, dal insegnament e de colaborazion sientifiche e culturâl cun istituzions talianis e forestis, judant cussì il svilup civîl, sociâl e economic dal Friûl", il Centri al intint lâ daûr di chestis finalitâts istituzionâls:

- a) promovi, davuelzi e coordinâ ativitâts di ricercje pal studi de lenghe, de storie, de culture, de societât, de economie e da la art dal Friûl e des comunitâts di origjin furlane tal forest;
- b) meti in vore lis iniziativis pal svilup de culture e de lenghe dal Friûl previodudis de Leç Regjonâl n. 15/1996 e sucessivis modificazions e altris leçs nazionâls e regjonâls;
- c) meti in vore iniziativis di studi, di ricercje e di formazion par dutis lis zonis di lenghe e culture ladine dal Cjadovri, dal Trentin, dal Sud Tirolo e dai Grisons, tant di diventâ element di riferiment sientific par une largje zone alpine leade di carateristichis culturâls e lenghisticis comuns o similis;
- d) promovi iniziativis di colegament tra i docents di letature e di lenghistiche ladine e di chei altris setôrs di ricercje de letare a) di chest articul, docents che a lavorin in Italie e tal forest;
- e) promovi, sustignî e organizâ ativitâts didaticis specialisticis tant che cors di perfezionament, inzornament, formazion, specializazion, dottorât;
- f) favorî par mieç di publicazions, cunvignis, seminaris e mostris, la promozion de lenghe e culture furlane;
- g) fâ ativitâts di consulence e di ricercje a pro di ents e istituzions;
- h) pandi tes formis che zovin di plui la cognossince des ativitâts di ricercje fatis dal Centri o di altris struturis de Universitât.

Art. 3 Aderents e mût di adesion

1. Il Centri al è costituît dai Dipartiments e di altris Struturis sientificis e didaticis de Universitât che ind àn promovût la istituzion o che a aderiran plui indenant.

2. A puedin aderî al Centri:

- a) docents e ricercjadôrs de Universitât;
- b) docents e ricercjadôrs di Universitâts talianis e forestis;
- c) esperts dal difûr de Universitât;
- d) Ents, Istituzions e Associazions che a operin in concuardie cu lis ativitâts dal Centri inte persone dal lôr rapresentant legâl.

CIRF - Centri interdipartimentâl pe ricercje su la culture e la lenghe dal Friûl "Josef Marchet"

Via Petracco, 6 - 33100 Udine; Tel. 0432 556480; Fax 0432 556481; E-mail CIRF@amm.uniud.it

3. Lis domandis di adesion, pai sogjets definîts des letaris c) e d) dal come 2 di chest articul, a varan di vê parie il curriculum scientific e/o di ogni altri document che al provi la congruence de domande cu lis finalitâts sientifichis e culturâls dal Centri. La adesion al Centri e à di jessi confermada a ogni trieni academic dal interessât.

4. La adesion al Centri si intint in vore fin a revoche firmade dal Aderent o dal Responsabil de strutture.

Art. 4 Orghins

1. A son orghins dal Centri:

- a) il Diretôr;
- b) il Consei Diretîf;
- c) la Assemblee.

Art. 5 Diretôr

1. Il Diretôr al è un docent de Universitât a timp plen, elet de Assemblee dal Centri e nomenât cun decret dal Retôr. Al dure in carche par trê agns academics e al pues jessi tornât a elei dome une altre volte seguitive.

2. Il Diretôr al à chescj compits:

- a) al rapresente il Centri;
- b) al é presiêr e al da esecuzion aes delibaris dal Consei Diretîf e de Assemblee;
- c) al à la responsabilitât de gjestion dal Centri;
- d) al viôt de gjestion amministrative e contabil dal Centri zovantsi dal personâl amministratîf assegnât ae strutture, o ben, in câs di assence, dal personâl destinât ai Centris Interdipartimentâi che al è inte Amministrazion Centrâl.

3. Il Diretôr al sieç jenfri i membrs dal Consei Diretîf un Vicediretôr che al tignarà lis sôs funzions in câs di impediment o di assence. Il Vicediretôr al è nomenât cun decret dal Retôr.

Art. 6 Consei Diretîf

1. Il Consei Diretîf al è l'orghin esecutîf dal Centri.

2. Il Consei Diretîf al è componût:

- a) dal Diretôr dal Centri;
- b) dai Diretôrs dai Dipartiments Aderents;
- c) di sîs rapresentants dai docents e ricercjadôrs de Universitât di Udine elezûts de Assemblee dal Centri.

3. Lis funzions di Segretari verbalizadôr a son davueltis dal personâl amministratîf assegnât ae strutture, o ben, in câs di assence, dal personâl destinât ai Centris Interdipartimentâi de Amministrazion Centrâl, o ben, dal conseîr plui zovin.

4. I Diretôrs dai Dipartiments aderents a concorin ae formazion dal numar legâl dome se presints.

5. Il Consei Diretîf al à chestis atribuzions:

- a) al met in vore e al coordene i plans di ativitât e di ricercje daûr des indicazioni de Assemblee dal Centri;
- b) al jude il Diretôr inte amministrazion dal Centri;
- c) al delibare lis spesis intai limits definîts de Assemblee dal Centri;
- d) al fâs buine ogni altre decision che e covente par rivâ aes finalitâts dal Centri;
- e) al cjape in esame e al da un parê su lis domandis di adesion al Centri, par chel che al è di sô competence;
- f) al propon ai orghins academics competents la stipule di contrats e convenzions cun ents publics o privâts, talians o foescj.

6. Il Consei Diretîf al è clamât adun dal Diretôr di regule ogni trê mêis e ogni volte che e sedi la necessitât o cuant che almancul un tierç dai siei components al fasi domande motivade e la clamade adun e à di jessi fate drenti di dîs dîs de domande.

7. Il Consei Diretîf al dure in cariche trê agns academics e i siei components si puedin tornâ a elei.

Art. 7 Assemblee dal Centri

1. La Assemblee dal Centri e je componude di:

- a) Diretôrs dai Dipartiments aderents o ben lôr delegâts;
- b) Aderents al Centri;
- c) rapresentants dai Ents, Istituzions e Associazions che a lavorin in concuardie cu lis ativitâts dal Centri inte persone dal lôr rapresentant legâl.

Pe verbalizazion si tegnin lis stessis disposizions fîssadis pes riunions dal Consei Diretîf.

2. La Assemblee dal Centri e à chestis atribuzions:

- a) e formule il program di lavôr an par an, e cjape in esam e e fâs bogns i programs che i vegnin sometûts dal Consei Diretîf, viodint di dâ ducj i sugjeriments che a coventin par un salt svilup de istituzion;
- b) e viôt dai adempiments previodûts di chest regolament su lis adesions al Centri; e elei i components dal Consei Diretîf.

3. La Assemblee dal Centri e je clamade adun dal Diretôr, che le presiêt, almancul dôs voltis ad an, e daspò almancul trente dîs de spedizion de clamade adun ogni volte che e torni la necessitât o cuant che almancul un tierç dai siei components al presenti domande motivade.

4. La elezion dal Diretôr e dal Consei Diretîf e ven fate cun vôt segret. Pal Consei Diretîf si puedin esprimi dôs preferencis. I aderents dal pont c) e d) dal art. 3 a fasin part dome dal eletôrât atîf.

5. In câs di paritât pe stesse cariche al ven elet chel che al fâs part dal Centri di plui timp, in câs ancjemò di paritât al ven elet il plui anzian par etât.

6. Par chel che nol è previodût si rimande ae normative in vore pes elezions des rapresentancis dai orghins academics.

7. Il spuei e il scrutini des schedis al ven fat subit daspò di vê sierât lis votazzidus di elezion dal President dal ufici e di doi scrutatôrs, nomenâts de Assemblee dal Centri. I risultâts a vegnin comunicâts daurman al Diretôr che al jes, che al clame adun il gnûf Consei Diretîf drenti di trente dîs des elezions.

8. Cuant che un puest di Conseîr al reste vueit, al jentre il prin dai no elets.

Art. 8 Personâl - Spazis

1. Il Centri al lavore zovantsi di personâl amministratîf, tecnic e ausiliari di une o plui des struturis Aderentis.

2. A saran pussibii comants, distacs o assegnazions di altris Ents publics o privâts o Istituzionai statâi, daûr de normative in vore e cul Statût di Autonomie de Universitât.

3. A podaran jessi assegnâts al Centri borsiscj di Ents talians e forescj.

4. Il Centri al lavore tai lûcs assegnâts, pal so funzionament, di une o plui des Struturis Aderentis o di Struturis esternis.

Art. 9 Articolazions e colaborazions esternis

1. Su la fonde des dibisugnis di funzionament a podaran jessi costituîts, tal grim dal Centri, grups, sezions, unitâts di lavôr.

2. A podaran jessi clamâts a lavorâ intai nuclis operatîfs ancje colaboradôrs esternis.

Art. 10 Fonts

1. Il Centri al pues disponi, in compatibilitât cu la normative finanziarie in vore, di chescj fonts:

- a) contribûts stanziâts des Struturis impegnadis intes ativitâts dal Centri;
- b) fonts assegnâts dal MURST e dal MPI, daûr di ce che al è previodût dal art. 4 de L. n. 168/89;
- c) fonts assegnâts dal C.N.R.;
- d) fonts otignûts cu la partecipazion a progjets di ricercje nazionâi e internazionâi;
- e) jentradis che a derivin di convenzions cun Ents nazionâi e internazionâi;
- f) jentradis che a derivin di convenzions su ativitâts di ricercje, di consulenze professionâl e di servizi a pro di tierçs;
- g) donazions e contribuzions finalizadis di Ents publics e privâts interessâts a contribuî aes ativitâts dal Centri;
- h) fonts assegnâts des leçs regionâls, nazionâls e comunitariis.

Art. 11 Gjestion amministrative

1. Il Centri al opere pal aspjet amministratîf tant che "Centri di spese" daûr di ce che al è previodût dal art. 58 dal Statût e dal art. 92 dal Regolamento di amministrazion de Universitât di Udin.

Art. 12 Normis finâls e transitoriis

1. Par ce che nol è previodût in maniere palese di chest regolament, si aplichin lis normis dal Statût, dai Regolaments di Ateneu e de legislazion in vore.

2. Par disfâ il Centri e covente une delibare de Assemblee dal Centri cun votazion cjapade cun maiorance dai 2/3 dai components che a àn dirit di votâ.

3. Chest Regolament al podarà jessi gambiât de Assemblee dal Centri cun votazion adotade a maiorance assolude dai presints.

Art. 13 Nature dal regolament

1. Chest regolament al à nature di regolament interni tant che ognidune di chês altris struturis dal Ateneu daûr dal art. 64, come 6, dal Statût di Autonomie de Universitât dai Studis di Udin.